



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo


Edisyong Bisaya
Bolyum XXXIX Numero 21
Nobembre 7, 2008
www.philippinerevolution.net

Editorial

Korapsyon taliwala sa krisis

Subling mibusikad ang walay kinutuban nga korapsyon, kabaklagan ug pagmaniobra sa rehimen Arroyo diha sa pagbuto na usab sa daan ug bag-ong mga kaso sa korapsyon. Dugang misibaw ang hisgotanan karon tungod sa nagkalain-laing pamaagi nga gihimo niini aron mapugngan ang imbestigasyon kang kanhi Undersecretary of Agriculture Jocelyn "Jocjoc" Bolante. Si Bolante, ang hepe sa mga opeytor ni Arroyo niadtong 2004 sa pagpangawat og P2.8 ka bilyon nga pundo sa Ginintuang Masaganang Ani, gipabalik bag-ohay pa lamang sa Pilipinas human gibalibaran sa US ang hangyo niya nga *asylum* (pagpadangop) didto.

Walay kalahian ang mga maniobra karon sa nagharang rehimen sa pagbangot usab niini sa uban pang mahimong motestigo mahitungod sa mga krimen nga gikalambigitan sa pamilyang Arroyo. Ang desperado ug garapal nga pagsulay sa rehimen Arroyo nga pugngan nga mosulti si Bolante sa Senado nagpakita sa hilabihan nilang pagkahadlok nga mabutyag unya sa publiko ang gikalambigitan nilang mga anomalya ug krimen nga siguro gyud nga makapasilaob sa kasuko sa katawhan. Hingpit ang pagpangningkamot sa rehi-



meng Arroyo nga ipabilin nga sirado ang mga sikreto sa anomalya sa Ginintuang Masaganang Ani ilabina kay laraw nila nga gamiton pag-usab ang mao gihapon nga iskema sa mo-abotay nga eleksiyong 2010. Sa balaudnon nga badyet sa rehimen alang sa 2009, kapin P3.3 ka bilyon ang gigahin ni Arroyo alang kunohay sa pagpalit ug pag-apud-apod na usab og abono. Kabahin kini sa P7 ka bilyon nga bag-ong alokasyon (pagtagana) alang sa Ginintuang Masaganang Ani—ang mismong programang gihimong

gatasan nila Arroyo ug Bolante niadtong 2004. Wala'g tuo ang uban pang laraw nila Arroyo ug sa iyang mga bata-bata aron labaw pang kalimasan ug matiti ang panudlanan sa nasud.

Ang pagsamot sa korapsyon ni Arroyo niining ulahing mga tuig sa iyang paghari kabahin sa mga pagpangandam niya aron labaw'ng masiguro ang pagpabilin niya sa gahum lapas sa 2010. Labaw'ng nagkahugot ang kapot niya sa poder sa sulabi nga kabalaka nga papanubagon siya sa iyang mga kasal-anan sa katawhan.

Puloan ka bilyong pisos nga pundo ang gitigom ni Arroyo isip pagpangandam sa atubangonon niya nga mga kombating

**Mga nagbaga
ning isyuha...**

26 ka armas
na-imbargo, 43
kaswalti sa AFP-PNP
PANID 4

7 ka detenidong
kauban sa Quezon,
gipa-ikyos sa BHB
PANID 5

Imperyalismong US
ubos kang Obama
PANID 11

pangpolitika ubay sa pagpangningkamot niyang magpadayon ang iyang gahum lapas sa iyang kasamtangang termino. Gamiton niya kining pangpalit og suporta sa mga politiko alang sa laraw'ng cha-cha (*charter change* o pag-usab sa konstitusyon) aron tugutan ang subli niyang paglansar isip presidente o punong ministro. Kundili man gani, gamiton niya ang dakoay kaayo nga pundo aron masiguro nga ana gihapon kaniya ang kaminud-anon (*loyalty*) sa mga modaogay nga mga kandidato ugaling mada-yon pa gihapon sama sa mi-agi ang eleksyon sa 2010. Duyog niini, gamiton ni Arroyo kining pundoha aron paliton ang kaminud-anon sa mga opisyal militar ug kapulisan ugaling mosangpot siya sa pagpahamtang og pagharing militar kung mapakyas ang gidusô niya nga Chacha.

Tungod sa dugang pagsamot karon nga sosyo-ekonomikanhong krisis, matag sentabos nga kawaton ni Arroyo gikan sa pundo sa nasud nagdugang sa kahapdos sa nagkutoy nga tiyan sa naglisud nga katawhan. Sa pagpangawat ni Arroyo og binilyon-bilyong pisos, labaw'ng nalusbog sa kalisdanan ug

pagkalinupigan ug labaw'ng nagpabaluroto sa kasuko sa katawhan. Nag-awas-awas ang kwarta sa mga bulsa nila Arroyo samtang minilyon-milyon ang gigutom, walay yutang matikad, walay laing pangita, walay klaro nga balay-kaulian. Daghan kaayo ang nagsakit ug anaay balatian ang dili makapalit og tambal, minilyon-milyon nga istudyante ang napugos motungha sa mga iskwelahan nga nagkagubâ-gubâ ug walay mga pasilidad ug minilyon pa ang dili man lang maka-iskwela tungod sa kalisdanan ug walay kaugmaon nga malaoman.

Hukman sa kasaysayan ang rehimeng US-Arroyo isip usa sa pinakabaklag nga gobyernong migamit og gahum aron mohakop og dakoay kaayong bahandi ug manumpo bugti sa naghingapin nga kaalaotan sa katawhan.


Dili angay'ng paipsoton sa katawhan ang wala'g tuo nga pagpamutbot, pagpanglimbong ug pagpangawat ni Gloria Arroyo. Dili angay'ng tugotan nga motinir pa siya'g dugay sa gahum. Ang tanan nga pagpakaaron-ingnon ug pagmaniobra ug ang matag gutlo sa pagpabilin niya sa gahum, iyang gigamit aron dugang pang mang-


lungkab ug hugtan pa'g dugang ang talikalà nga naggapos sa katawhan.

Kinahanglan nga gamiton sa katawhan ang tanan nga pamaagi aron mapugngan ang nagkalain-laing laraw ni Arroyo aron molugway pa ang iyang paghari. Kinahanglang padayon nga manglimbasog ang tanang pwersang demokratiko, patriyotiko ug anti-Arroyo nga magkahiusa luyo sa pagsulay sa Malacañang nga siak-siakon ug dugmokon sila. Kinahanglan nga pandayon kining maong panaghiusa aron matigom nila ang kusog nga molumpag kang Arroyo.

Labaw'ng nahimong matngon ang katawhang Pilipino sa panginahanglan sa rebolusyonaryong pag-alsa samtang labaw sila nga nalusbog sa kalisdanan ug pagkaatrasado taliwala sa padayon nga nagkagrabing sosyo-ekonomikanhong krisis ug mga krimen sa nagharing rehimen. Samtang nagkagrabi ang kamangtas sa rehimeng Arroyo, dugang nagkalig-on ang determinasyon sa katawhan nga taakon ug subayon ang dalan sa armadong rebolusyon.

Sa pagtubay sa lapad nga rebolusyonaryong kalihukan ubos sa pagpamuno sa Partido Komunista sa Pilipinas (PKP), ug pagpursigi sa tanang mga anti-imperyalista, antipudal ug antipasistang pwersa, labaw'ng nagkakusog ug nagkaylap ang pakigbatok sa katawhang Pilipino. Walay pagkapuol ang pagpanglimbasog sa mga rebolusyonaryo, patriyotiko ug demokratikong pwersa sa pagpasiugda sa interes sa katawhan ug pagpaas-dang sa ilang mga pakigbisog. Padayon nga pakusgon ug pasubson ang mga taktikal nga opensiba sa mga armadong rebolusyonaryong pwersa, mga pakigbisog sa katawhan ug uban pang pamaagi sa pakigbatok aron taposon na ang paghari ni Arroyo ug paatubangon siya sa paghukom sa katawhan. **AB**

	
Bol. XXXIX No. 21 Nobembre 7, 2008	
Ang <i>Ang Bayan</i> gipagula sa pinulongan nga Pilipino, Bisaya, Iloko, Hiligaynon, Waray ug Ingles.	
Mahimo kining <i>i-download</i> gikan sa Philippine Revolution Web Central nga mahipalgan sa:	
www.philippinerevolution.net	
Modawat ang <i>Ang Bayan</i> og mga tampo sa dagway sa mga artikulo ug balita. Giawhag usab ang mga magbabasa nga magpadangat og mga pag-saway ug rekomensyon ngadto sa pagpalambo sa atong mantalaan. Maa-bot kami pinaagi sa <i>email</i> sa:	
angbayan@yahoo.com	
Mga unod	
Editoryal	
Korapsyon taliwala sa krisis	1
Pagbangot kang Bolante	3
Madaugon nga mga TO	
26 nga armas na-imbargo sa mga opensiba	4
43 aksyong militar sa BHB sa Samar	4
7 detenido sa Quezon, gipa-ikyos sa BHB	5
Operasyong disarma sa Davao Oriental	6
Pag-eskapo gikan sa kaaway	7
Kursong pang-opisyal sa Eastern Visayas	7
Pagpanggun-ob sa pasistang estado	
Paglutos sa mga ligal nga aktibista	8
Target: Mga aktibista sa ST	9
Mga Moro, biktima sa militarisasyon	10
Imperyalismong US ubos kang Obama	11
Balita	12
Ang <i>Ang Bayan</i> gimantala makaduha ka beses matag bulan sa Komite Sentral sa Partido Komunista sa Pilipinas	



Pagbangot kang Bolante

Tungod sa deportasyon sa US ni kanhi Undersecretary of Agriculture Jocelyn "Jocjoc" Bolante niadtong Oktubre 28, dili na mosalir ang karaang pamaagi sa rehimen nga tipigan siya sulod sa nasud o kaha paipsoton siya gawas sa Pilipinas aron makalihay sa imbestigasyon sa mga higanting kaso sa korapsyon nga gi-atubang niya. Ingon pa man, wala pa gihapoy hunong ang rehimen sa mga palusot ug maniobra.

Si Bolante ang nag-unang ope-reytor ni Arroyo sa pagkurakot sa P2.806 ka bilyon nga pundo sa Ginintuang Masaganang Ani nga gigamit sa kampanya sa administrasyon niadtong 2004. Pinakakontrobersyal lamang nga bahin niini ang P278 ka milyong *fertilizer fund* nga napuno sa anomalya.

Anaay mando ang Senado niadtong 2005 nga ipaaresto si Bolante, human ang inutro-otro niya nga paglihay nga motabong sa imbestigasyon sa Senado sa kaso. Gipa-ipsot siya sa rehimen Arroyo gawas sa nasud niadtong 2005 ug nangayo siya og *asylum* sa US niadtong 2006. Aduna na'y direktang pagtan-aw ang mayorya sa Senado nga anaay kasalanan si Bolante ug gikinahanglan na lamang makuha ang testimonya niya aron mapormalisa ang hukom ug sirad-an na ang kaso.

Wala mahimo sa Malacañang nga

gam-on ang ala-Jun Lozada nga pag-gunit kang Bolante tungod kay nakapokus ug nakakonsentret og maayo ang masmidya ug publiko sa iyang pagpa-uli. Apan samtang gidiretso sa St. Luke's Medical Center sa Quezon City, bisan unsa na lamang ang gihunahuna nga pagmaniobra sa rehimen aron dili paatubangon si Bolante sa Senado ug sa ingon mabangotan siya.

Aron magdugay pa siya sa hospital, bisan unsa na lamang ang gihulagway nga balatian ni Bolante luyo sa giingon sa iyang *medical bulletin* nga istable ug normal ang iyang kondisyon. Gidiretso si Bolante sa hospital human kini moreklamo nga sakit ang iyang dughan dihang mi-landing na ang eroplano sa Manila International Airport. Lahi sa ordinariyong pasyente, wala siya ideretso sa *emergency room*, hinuon, sa usa ka mahal kaayo nga kwarto sa St.

Luke's kundiin anaa na'y mga doktor nga nagpaabot kaniya. Gimando ni Dr. Ramon Saavedra, ang doktor ni Bolante, nga dili siya modawat og mga bisita.

Duyog niini, gipadali-dali ni Bolante sa Supreme Court nga aprubahan ang petyon alang sa *temporary restraining order* (TRO) aron pugngan ang Senate Sergeant-at-Arms nga arestuhon siya ug paatubangon sa Senado. Niining Nobembre 3 gibakwi sa abugado ni Bolante ang petyon alang sa TRO, tungod sa pagkatinuod naaresto na sa Senado ang iyang kliyente.

Samtang, gibuksan sa Department of Justice ang imbestigasyon sa Office of the Ombudsman sa kaso sa pagkawit sa P432 ka milyon nga pundong pang-abono nga gisang-at sa tagamasmidya nga si Marlene Esperat batok kang Bolante. Nahitabo kini matapos gitulgan ang kaso og tulo ka tuig ni Ombudsman Mercedes Gutierrez, higala sa mga Arroyo.

Ang daklit nga pag-abli niining imbestigasyon gigamit karong hinungdan aron pugngan ang Senado sa kaugalingon niining imbestigasyon. Sumala pa nila Sen. Edgardo Angara ug Juan Miguel Zubiri, duha sa mga lunud-patay nga tigpanalipod sa mga Arroyo, magkabinangiy lamang kuno ang Senado ug ang Ombudsman kung ipursige pa sa Blue Ribbon Committee ang imbestigasyon. Segun pa kang Gloria Arroyo, nagpagawal o nagpasikat lamang ang mga senador ug kongresistang nagpursige nga subling buksan ang imbestigasyon sa *fertilizer fund scam* ug uban pang mga iskandalo nga lambigit ang Malacañang.

Niining ulahi, nagsang-at og petyon alang sa *writ of habeas corpus* si Owen Bolante, anak ni Bolante, sa Court of Appeals, gilaoman sa mga Bolante ug pundok nila Arroyo nga mopabor sa administrasyon ang giingon nga hukmanan, sama sa nahimong patern sa mayoryang desisyon niini sa mi-agi. AB



26 armas na-imbargo, 43 kaswalti natagamtam sa AFP-PNP

Baynti-kwatro nga haypawer nga riple ug duha ka pistola ang naklin-ing sa mga Pulang manggugubat sa Bagong Hukbong Bayan (BHB) sa managkabulag nga taktikal nga opensibang gilunsad sa mga gerilya sukad niadtong Oktubre 4 hangtud Nobembre 5. Baynti-tres nga mga elemento sa Armed Forces of the Philippines (AFP), Philippine National Police (PNP) ug CAFGU ang namatay ug 20 ang hisamdan sa mga panagsangka.

Nobembre 5. Usa ka elemento sa CAFGU ang namatay dihang giisnayp kini sa mga Pulang manggugubat sa gawas sa ilang detatsment sa Sityo Balagonon, Barangay Managa, Bansalan, Davao del Sur.

Nobembre 3. Usa ka sundalo sa 57th IB ang naangol sa usa ka engkwentro tali sa mga Pulang manggugubat sa BHB ug militar sa Sityo Talahek, Barangay Bacong, Tulunan, North Cotabato.

Nobembre 1. Duha ka elemento usab sa CAFGU ang hisamdan dihang gi-ataki sa mga Pulang hukbo ang detatsment sa militar sa Barangay Mararag, Marihatag, Surigao del Sur.

Oktubre 29. Unom nga M16 ug usa ka kalibre .38 nga rebolber ang nakumpiska sa mga Pulang manggugubat sa BHB sa Jose C. Aquino Rubber Company, usa ka plantasyon sa goma sa Barangay Sta. Teresita, Bayugan City, Agusan del Sur. Duyog niini, giimbargo usab sa mga gerilya ang M16 sa usa ka sarhento sa AFP sa usa ka tsekpyont nga giplastar sa mga gerilya sa Barangay San Jose, Prosperidad, Agusan del Sur.

Oktubre 25. Napulo'g unom nga mga haypawer nga armas ang na-imbargo sa BHB ug milisyang bayan dihang ilang gi-ataki ang detatsment sa CAFGU ubos sa 37th IB nga anaa sulod sa plantasyon sa Dole-Stanfilco sa Barangay Luna Sur, Makilala, North Cotabato. Usa ka elemento sa CAFGU ang namatay ug usa ka sarhento ug tulo pa nga mga CAFGU ang samaron.

Gi-ambus usab sa usa pa ka grupo sa mga Pulang manggugubat ang mga sundalo sa 57th IB gikan sa Barangay Luna Norte nga moreimpors unta sa gireyd nga detatsment.

Sumala pa ni Ka Dencio Madrigal, tigpamabâ sa Valentin Palamine Command sa BHB sa Far South Mindanao, ang maong reyd usa ka aksyon-pagsilot sa Stanfilco sa pagpangilog niini og yuta sa gagmay'ng mag-uuma ug sa bangis nga pagtratar niini sa mamumuo. Sa kasamtangan, kapin 30,000 ka hektaryas na ang gilapdon sa mga plantasyon sa saging ug pinya sa Dole-Stanfilco

sa rehiyon.

Usâ pa niini gipahimangnoan na sa BHB ang Stanfilco nga hunongon na ang pagpangilog niini og yuta ug maminaw sa mga mulô ug hugot nga pangayo sa katawhan. Apan inay nga paminawon ang reklamo sa lumulupyo, labaw pang nahimong agresibo ug pasista ang pagtratar sa Dole -Stanfilco diha sa mga mag-uuma ug mamumuo. Gidugangan pa hinuon niini ang mga personel sa detatsment ug gipakusog ug gipakusob ang mga operesyong militar sa plantasyon.

Oktubre 25. Usa ka sundalo sa 66th IB ang hisamdan dihang gi-ambus sa mga gerilya sa BHB ang trak nga gisakyan sa mga sundalo sa Barangay Olaycon, Monkayo, Compostela Valley. Usâ pa niini, usa ka sundalo ang namatay dihang gi-ataki sa mga gerilya sa BHB ang detatsment sa Special Forces Battalion sa Philippine Army sa Barangay Canidkid, Montevista, Compostela Valley.

Oktubre 24. Walo nga mga sundalo ang namatay, lakip ang na-

43 aksyong militar, nalunsad sa BHB sa Samar

SAYSINTA-E-NWEBE nga mga elemento sa kaaway ang namatay sa sagunson nga mga aksyong militar nga gilunsad sa Bagong Hukbong Bayan (BHB) sa isla sa Samar sukad niadtong Enero hangtud sa unang semana sa Septembre. Baynti-singko nga mga elemento sa kaaway ang hisamdan sa maong mga panagsangka samtang lima nga Pulang manggugubat ang nahimong martir. Napulo'g lima nga mga haypawer nga armas ang naimbargo sa BHB.

Sumala sa pasiunang pagtalà sa Regional Operations Command sa BHB sa rehiyon, sukad niadtong Enero hangtud Septembre 6 nakalunsad ang BHB sa isla og 43 nga mga aksyong militar sa mga probinsya sa Samar, Northern Samar ug Eastern Samar. Gilangkoban kini sa usa ka reyd, lima ka ambus, 29 nga mga operesyong isnaying, pito nga mga *special operation* ug usa ka pagdis-arma. Naatubang ug napangibabwan sa BHB ang unom ka dependensya ug lima ka ingkwintro.

Sa 43 nga mga aksyong militar, 24 ang nahitabo sa Samar, 15 sa Northern Samar ug upat sa Eastern Samar.

Ang padayon nga aksyong militar gilunsad sa BHB isip kabahin sa kampanya aron pakyason ang pagpanggun-ob sa isla sa Oplan Bantay Laya 2.

AB



munong opisyal nila nga tinyente, dihang gi-ambus sa mga Pulang manggugubat sa BHB ang nagpatrolyang tropa sa 66th IB sa Barangay Manurigao, New Bataan, Compostela Valley.

Oktubre 23. Usa ka elemento sa CAFGU ang namatay ug upat pa ang hisamdan dihang gi-ataki sa mga Pulang manggugubat ang detachment sa CAFGU ubos sa 72nd IB sa

Paquibato District, Davao City.

Oktubre 23. Walo nga mga sundalo ang namatay ug tulo ang hisamdan dihang girakrakan sila sa mga Pulang manggugubat sa Nerisa San Juan Command (NSJC) sa BHB-Catanduanes ang payag nga gipundohan nila. Sumala sa taho ni Ka Theresa Magtanggol, tigpamaba sa NSJC, gisakmit sa mga kauban ang higayon diin gikapoy na pag-

ayo ug nagpahulay ang mga tropa sa Philippine Army ug CAFGU sa usa ka bakanteng payag sa Barangay Hिलawan, San Andres, Catanduanes. Pila ka adlaw na nga gisuyod sa kaaway ang managkanait nga mga Barangay Tibang, Barihay ug Hिलawan samtang gimonitor usab sila sa mga gerilya. Sa kahadlok nga maigo usab sila sa mga bala, mibakatin og dagan sa lugar sa gikasangkaan ang usa pa ka iskwad sa militar nga nagpahulay usab sa kasikbit nga lugar.

Oktubre 19. Usa ka abusadong pulis ang giimbargohan sa mga Pulang gerilya sa kalibre .45 nga pistola ug usa ka ripleng M14 sa palengke sa Escalante City, Negros Occidental.

Oktubre 13. Usa ka elemento sa CAFGU ang hisamdan dihang gisulong sa mga gerilya sa BHB ang detachment sa 72nd IB sa Sityo Bukobuko sa Anay, Barangay Kingking-Poblacion, Pantukan, Compostela Valley.

Oktubre 13. Duha nga mga sundalo ang namatay dihang gibanhigan sa mga Pulang manggugubat ang usa ka trak sa militar sa Talaingod, Davao del Norte. Usâ pa niini, usa ka elemento sa CAFGU ang namatay dihang gireyd sa BHB ang detachment sa 72nd IB sa Barangay Palma Gil sa mao gihapong lungsod.

Usa pa ka elemento sa CAFGU ang hisamdan dihang gipaaranan og bala sa mga gerilya nga BHB ang gitapo nga pwersa sa 72nd IB ug CAFGU sa Sityo Likupon, Barangay Sanghay, Mati, Davao Oriental.

Oktubre 4. Tulo ka sundalo sa 29th IB ang hisamdan dihang giambus sa mga Pulang gerilya ang ilang konboy sa Sityo Kapihan, Barangay Concepcion, Valencia City, Bukidnon.

Walay nataho nga mga kaswalti sa bahin sa mga Pulang manggugubat niining tanan nga mga taktikal nga opensiba.

7 nga detenidong kauban, gipa-ikyas sa BHB sa Quezon

WALAY buto nga gireyd sa mga Pulang gerilya sa Apolonio Mendoza Command (BHB-Quezon) niining Oktubre 25 ang Quezon Provincial Jail sa Lucena City ug gipa-eskapo ang pito nga mga kauban nga nakadeteyn didto. Nalunsad ang reyd sulod lamang sa 10 minutos.

Aron makasulod sa bilanggoan, ang mga Pulang manggugubat nagtakoban nga mga elemento sa Special Weapons And Tactics (SWAT) ug Philippine Drug Enforcement Agency (PDEA) nga anaay kuhaon nga bilanggo. Gi-atol nila ang pag-ataki sa panahon sa pagpuli og gwardya. Dihang migawas ang mopauliyang mga gwardya, nag-atang na usab ang mga Pulang manggugubat sa ganghaan.

Gitionan gilayon, gipa-ubo ug gidisarmahan og lima ka rebolber ang mga gwardya usâ sila ibalhog sa presohan kuyog ang uban pang gwardya. Usa ka *private security guard* ang misulay og tabang gikan sa kanait nga bilding apan gibabagan siya sa mga Pulang manggugubat, giimbargo ang iyang *shotgun* ug gilakip siya sa mga nau-na nang gipreso nga mga gwardya.

Sakay sa upat ka *van*, mi-atras gilayon sa nagkalain-laing direksyon ang mga gerilya human ang madaugon nga pagpa-ikyas. Duha ka pulis ang hisamdan dihang gibabagan nila ang mga gerilyang sakay sa usa ka *van* sa usa ka tsekpoyn sa Barangay Iyam, Lucena City. Gilabayan og granada sa mga Pulang manggugubat ang mga pulis usa kini miikyas pagdayon.

Ang mapangahason nga operasyon sa BHB gilunsad sa sentrong bahin sa Lucena City kundiin nahimutang usab ang Quezon Convention Center, Regional Trial court, Philippine National Red Cross ug ang kapitolyo sa probinsya. Duol usab ang maong bilanggoan sa Camp Guillermo Nakar, Punong hedkwarters sa Southern Luzon Command sa AFP.

Usa ka bulan nga gimonitor sa mga gerilya ang lihoc sa kaaway usâ pa ipatuman ang operasyon. Pito nga mga pistola ug usa ka *shotgun* ang naklining nila niining maong espesyal nga operasyon.

Ikaduhang higayon na kini nga pagpaikyas sa mga bilanggong politikal sa Southern Tagalog. Niadtong Enero 14, 2006, gipa-ikyas usab sa mga Puma sa Edgardo Dagle Command ang siyam nga mga gerilya sa BHB nga gibilanggo sa Batangas Provincial Jail sa Batangas City.

AB

AB



Operesyong dis-arma sa Davao Oriental Provincial Jail

Kini nga artikulo nakabasi sa taho koresponsal gikan sa mga kauban sa 3rd Pulang Bagani Command sa BHB sa Southern Mindanao.

Mapangahason usab ang gilunsad nga operesyong dis-arma sa mga Pulang manggugubat sa Davao Oriental Provincial Jail sa Mati City niadtong Mayo 19. Ang mga gerilya naggikan sa 3rd Pulang Bagani Command, kuyog ang usa ka platoon sa Front 18 ug tagsa ka iskward sa Front 2 ug Front 27.

Sulod lamang sa kapin-kon-kulang 15 minutos, nasulod sa mga Pulang manggugubat ang *provincial jail* nga pila ka kilometro lamang ang gilay-on sa *city hall* sa Mati. Nasakmit nila ang duha ka M16, usa ka M14, duha ka Garand, tulo ka karbin, duha ka *shotgun*, duha ka pistolang 9 mm, usa ka .45, usa ka .357 ug nagkalain-laing matang sa bala. Naka-imbargo usab ang mga gerilya og mga magasin, 12 nga mga posas, usa ka *base radio* ug mga *hand-held radio*.

Walay kaalinggat ang mga gwardya sa *provincial jail* nga mga gerilya na diay sa BHB ang mga yunipormado nga nagsakay sa duha ka trak ug usa ka *van*. Gidala gilay-on sa *strike squad* sa BHB ang mga gwardya sa *gate* paingon sa sulod sa opisina sa *jail warden* samtang duha pa ka tim sa mga gerilya ang nagbantay sa tore sa *guard house*, sa purok nga giistambayan sa mga gwardya ug sa usa pa ka tore tapad sa armori. Ang usa pa ka iskward anaa sa gawas ug nagmonitor sa li-hok sa mga gwardya.


"Armas lang ang among tuyò". Kini ang gibungat sa mga gerilya human sila nagpaila nga mga gerilya sa BHB ug mideklara og dis-arma. Nakugang ang mga gwardya. Sa sobrang kahadlok wala na kini'y nahimo kundili ihatag nga walay daghang langas ang gigunitan nilang mga *shotgun*. Wala usab

makalihok ug daw natuskig ang *jail warden*. Samtang gipahigayon ang pagdis-arma, adunay mga bini-langgo nga nagpadayag og pasalamat tungod kay nila pa, nasulod ra gyud ang maong bilanggoan nga ilhado ug sikat sa korapsyon ug nahatagan og leksyon ang mga abusadong gwardya. Anaay pipila ka binilanggong kriminal nga minghangyo nga palayaon sila, apan tungod kay nagtamod ang mga Pulang manggugubat sa prinsipyo sa

rebolusyonaryong hustisya ug dili sa yanong pagpalaya lamang sa kinsa mang gibilanggo, wala nila tumana ang maong hangyo. Ingon pa man, dihang mi-atras na ang mga kauban, anaay bilanggo nga misinggit nga "Mabuhay ang NPA! Mabuhay ang Rebolusyon!"

Midangat sa PNP ang taho mahitungod sa reyd apan walay gi-himo ang mga pulis kundili babagan ang karsadang paingon sa ilang hedkwarters. Segun pa sa mga bombero nga nakapundo usab duol sa hedkwarters, maayo ra kunong moataki og litson ang mga pulis, apan kung atakihon sila sa kaaway dili na moresponde o more-impors.

Malipayon kaayo ang masa dihang hilantawan nila ang mga kauban matapos ang taktikal nga opensiba tungod kay walay nausik nga mga bala ug wala usa'y kinabuhing nakalas sa han-ay sa mga kauban. AB



Pag-ikyap gikan sa kaaway

"**L**ig-on na ang akong barug niatong adlaw na dili gyud ako magpadakop og buhi sa mga kaaway ug nakulit na sa akong alimpatakan nga andam na akong mamatay aron lang makaikyap!"

Kini ang gibungat ni Kasamang Don, usa ka Pulang manggugubat sa usa ka probinsya sa Southern Tagalog nga naka-ikyap sa kamot sa kaaway human ang 17 ka adlaw nga pagkatanggong sa bilangoan.

Hidakpan sila Ka Don ug duha pa nga manggugubat niatong Septembre taliwala sa pagtuman nila sa gimbuhatong paniktik isip pagpangandam sa usa ka taktikal nga opensiba.

Dihang gidakop sila ug gidala sa kampo sa militar gipailalom gilayon sila sa saykolodyikal nga tortyur. Gibaharan sila nga maangin ang ilang pamilya kung dili sila motabang sa kaaway. Ang iyang kuyog wala makasustinir sa maong pagbahad ug napugos nga mohatag og impormasyon sa kaaway. Gisulayan usab sa kaaway nga tanyagan si Ka Don og dakong kwarta kung itudlo niya ang uban

pa niya nga mga kaubanan. Wala kini mosalir kaniya.

Niadlong ika-15 ka adlaw diha sa pagkadakop sa kaaway, naglaraw na si Ka Don nga mo-ikyap sa kampo. Una niyang gisulayan nga moagi sa pultahan sa ilang gikahimutangan ug mangita'g higayong maka-iskapo apan anaay kaaway nga nakapwesto didto niatong adlaw. Pagka-ugma usab naatol nga anaay nagbantay nga sundalo sa palibot. Sa gabii sa misunod nga adlaw nakakita siya og higayon dihang nasiplatan niya nga nag-inom ang mga sundalo.

Nananghid lamang siya sa sama niyang detenido nga kuhaon niya ang iyang mga

hinayhay nga sinina. Apan dihang nakuha na niya ang iyang sinina dali-dali niya kining giputos ug misutoy siya pagdagan paingon sa gawas sa bilangoan.

Dihang nakagawas na siya, kinahanglan pa niyang lutsan ang mga *barbed wire* nga nakapalibot sa detasment ug ang mga dagkong suga (*search light*) sulod sa kampo. Hapit 20 nga mga nagbabag nga mga kural nga mga *barbed wire* ang iyang gilutsan. Nagkasamad-samad ug nagkapa-ngos-pangos siya dihang gilatas ang hapit usa ka hektarya nga kalapdon nga kampo.



Kursong pang-opisyal sa BHB sa Eastern Visayas, mi-asdang

Usa ka gatus na nga mga opisyal ug kadre sa Partido ug Bagong Hukbong Bayan (BHB) sa Eastern Visayas ang migradwar sa ispesyal nga kursong pagbansay-opisyal sukad gitukod sa Efren Martires Command sa BHB ang tunghaang politiko-militar niini niadtong Disembre 2007.

Kabahin sa ispesyal nga kurso ang pagtuon sa mga balaud sa gubat sa kinatibuk-an, mga pagtulon-an gikan sa gerilyang pakiggubat sa China ug Vietnam, mga partikular nga kinaiya sa gubat sa katawhan sa Pilipinas ug mga pagtulon-an gikan sa kasinatian sa gerilyang pakiggubat sa rehiyon. Gihatagan usab og duso sa kurso ang pagpadagan (*direct*) sa gubat sa taktikal nga ang-ang (sama sa usa ka aksyong militar) ug operesyonal nga ang-ang (sama sa seres nga mga aksyong militar sa mas lapad nga linangkoban ug pana-

hon).

Sa teoretikal nga mga pagtuon, gikombinar ang lektura ug mga *workshop* ug pagtuon sa mga pinili nga kasinatian o *case study*. Gihimo usab ang pipila ka mga *military exercise* ug *drill* aron makabaton og istandar-disasyon sa pagpadagan niini sa mga opisyal sa iya-iyahay'ng yunit o erya. Gisukip usab ang pagbansay sa mga opisyal sa istap base sa panginahanglan, sama sa mga *crash course* sa gimbuhatong paniktik ug komunikasyon. Anaay partikular usab nga pagbansay sa mga opisyal pangpolitika sa iskwad ug platon.

Sa lima ka bats nga nakagradwit na sa mga kurso sa tunghaan, modagan sa unom hangtud napulo ka adlaw ang mga pagbansay. Segun sa mga migradwit, signipikante ang nadugang sa ilang kompanya ug kahibalo diha sa pagpamuno ug pagpadagan sa mga

Dihang nakagawas na siya sa detatsment gibaktas niya ang haywey aron makaabot sa baryo nga iyang nahibaw-an. Anaay higayon nga hisugatan niya ang mga sundalo, busa namidpid lang siya sa mga dalan aron dili siya mailhan. Misangko og tulo ka oras ang iyang pagbaktas usâ siya mi-abot sa usa ka baryo kundiin nasayod siya nga naay makatabang kaniya.

Kaadlawon na dihang mi-abot siya sa baryo. Uhaw siya kaayo niadtong tungura, gitakigan sa katugnaw ug kakapoy sa gilay-on sa iyang gibaktas. Nanuktok siya sa usa ka payag ug dihang gi-ablihan siya'g pultahan nagpaila siya gilayon nga manggugubat sa BHB. Gipatin-aw ug gipasabot niya ang tagbalayon nga mi-eskapo siya sa kampo ug nangayo siya og tabang nga makakoneksyon siya sa Hukbo.

Sa sinugdan nabalaka ang tagbalay ug nagduhaduha sa pagtabang. Apan gipadangatan siya sa mga Pulang manggugubat nga anaa usab niadtong tungora nga akataron ug atimanon si Ka Don. Gipakaon ug gipapahulay gilayon sa tagbalayon ang kauban.

Wala magdugay mi-abot ang usa ka tim sa mga Pulang manggugubat aron istoryahan si Ka Don. Gitun-an sa pamunoan sa yunit ang gitaho nga resulta sa interbyu kang Ka Don ug nakombinsi sila nga ti-nuod ang iyang gisaysay. Pagkagabii gipakuha na siya ug diha-diha gikuyog pagusab sa yunit.

Dalaygon ang paghukom ni Ka Don nga magpakalig-on samtang anaa sa kamot sa kaaway ug ang iyang makuti nga pagplano ug pursigidong pag-ikyap. Makutloan kini og mga pagtulon-an alang sa kang kinsamang kauban nga mabutang sa maong sitwasyon nga makabaton og kusog ug kaligon nga atubangon ang ingon niining mga kahimtang. AB

Paglutos sa mga ligal nga aktibista, mikuyanap

Iligal nga pag-aresto sa mga personahe sa ligal nga demokratikong kalihukan ug pagsang-at og mga ginama-gama nga kasong kriminal batok kanila ang pinakasibaw sa mga kaso sa paglapas sa tawhanong katungod nga natigom sa *Ang Bayan*.

Nobembre 6. Gipaarakan hangtud sa mamatay sa mga lalaki nga nagsakay sa upat ka motorsiklo si Danny Qualbar, *municipal coordinator* sa Bayan Muna sa Compostela, Compostela Valley. Pauli na niadtong tungora si Qualbar sa iyang balay dihang gi-ambus siya sa lungsod sa Osmeña sa mao gi-hapong probinsya mga alas-5:30 sa hapon.

Nobembre 6. Gisulayan pagpatay si Arnold Cerdo, bise presidente sa Sensuous Union Labor Organization ug istap sa Cabuyao Workers Alliance. Nakig-istorya niadtong tungora si Cerdo sa iyang bayaw sa iyang balay sa Riverside, Calamba City mga alas-9:30 sa gabii dihang girakran sila sa duha ka lalaki nga nakabonet. Hapit ma-igo'g bala ang nawong ni Cerdo.

Nobembre 4. Gibasura sa korte ang petisyon alang sa *writ of amparo* sa pamilya ni Mary Grace Delicano, membro sa Gabriela nga illegal nga gi-aresto niadtong Septembre sa Bacolod City. Luyo kini sa iregularidad sa pagkaaresto sa PNP kang Delicano. Napatik sa mandamyento de aresto nga gigamit sa pagdakop kang Delicano nga alang kini sa usa ka nag-alyas nga "Kim" nga akusado sa pagpangawat kalambigit sa usa ka reyd sa Bagong Hukbong Bayan (BHB) sa Escalante, Negros Occidental niadtong Marso 2005 kundiin naka-imbargo ang BHB og siyam nga mga armas. Wala napatik sa mandamyento ang ngalan ni Delicano.

Usâ lamang gipaamyenda sa kapulisan sa korte ang mandamyento nga si Delicano ug si "Kim" usa ra kuno human sa pag-aresto kang Delicano.

Oktubre 31. Gisulayan pagpugong ni Lt. Col. Manuel Sequitin, hepe sa 66th IB ang pagbakwit sa kapin-kon-kulang 300 nga mga pamilya gikan sa Barangay Andap, New Bataan, Compostela Valley niadtong Oktubre 31 luyo sa peligro sa ilang kinabuhi bunga sa mga operesyong militar sa ilang lugar. Paingon sa sentro sa New Bataan ang mga sibilyan dihang gipugngan sila sa militar nga nagbungat nga sa Sityo Mother of Perpetual Help na lamang sila moplastar, bisan pa duol kini sa mga panagsangka tali sa militar ug BHB. Naduso gihapon sa mga sibilyan ang pag-adto sa poblasyon, kundiin gihimong temporaryo nga *evacuation center* ang New Bataan Gym. Nag-istar ang mga sibilyan sa poblasyon sa New Bataan hangtud Nobembre 1. Bunga sa seres nga mga operesyong militar, gibutang sa *state of calamity* sa mayor sa New Bataan ang Barangay Andap ug kanait nga Barangay Manurigao.

Oktubre 31. Biktima sa harassment ang tagamasmidya nga si Loreto Rosario, reporter sa dxMS, dihang nagtaho siya bahin sa pagkasunog sa Field Supply Support Unit sa AFP nga anaa sulod sa Camp Siongco sa Datu Odin Sinsuat, Shariff Kabunsuan. Sumala pa ni Rosario, gisita siya ni Col. John Oswald Bucu, komander sa Camp

Siongco, gikompiska ang iyang *press card* ug mga *cell-phone* ug gitawag nga pakialamero o hilabtanon.

Oktubre 30. Gipik-ap sa komposit nga mga elemento sa Caloocan Police ug Intelligence Service of the AFP si Norberto Murillo Sr., 52, sa iyang balay sa Camarin, Caloocan City. Si Murillo, nga gi-akusahan nga opisyal sa Partido Komunista sa Pilipinas (PKP) iligal nga gidakop base sa tinumo-tumo nga kaso sa pagpatay kalambigit sa nahitabo kuno nga pinurgahay sa Hilogos, Leyte niadtong 1985.

Oktubre 24. Ginama-gama nga kasong pagpatay ug pagpangawat ang gigamit nga rason aron arestuhon ang magtiayon nga Margie Lupo Navia ug Donato Palo sa Barangay Bolo, Labrador, Pangasinan. Sila Navia ug Palo, nga gi-akusahan nga mga opisyal sa PKP sa Quezon gi-aresto sa mga pulis sa Pangasinan samtang nagpaingon sa balay sa ilang mga parente. Gidala sila sa

hedkwarters sa 3rd Intelligence Service Unit sa Philippine Army sa Tarlac.

Oktubre 13. Usa ka lalaki ang grabing hisamdan human siya ma-igo og *shrapnel* gikan sa M203 nga gipabuto sa mga sundalo sa Barangay Sanghay, Mati, Davao Oriental. Nagbantay niadto sa iyang tindahan si Isidro Gerona, 60, dihang nagsangka ang BHB ug mga elemento sa 72nd IB sa duol nga lugar. Midagan ang pamilya Gerona aron makahipli sa binuthanay apan nabilin ang ilang amahan. Gibalikan kini sa iyang anak human hidunggi ang pagbusikad sa granada gikan sa M203 sa ilang balay. Nakita niya nga nagkadugo ang iyang amahan ug patay na sab ang ilang iro tungod sa igo sa *shrapnel*. Gubâ usab ang ilang lamesa nga kanan. Sumala sa anak sa biktima, nagpadayon ang paturagas nga pagpabuto sa mga sundalo bisan dugay na nga mihawa ang mga gerilya sa BHB. **AB**

Target: Mga aktibista sa Southern Tagalog

Nag-atubang karon sa mangilngig nga kampanyang pagpanumpo ang mga lider-masa ug aktibista sa dayag nga demokratikong kalihukan sa Southern Tagalog. Kwarenta nga mga lider ug membro sa mga progresibong organisasyon sa rehiyon ang gisang-atan sa rehimeng Arroyo ug mga ginama-gama nga kasong kriminal. Baynti-siyete kanila akusado sa pagpanilab sa Globe Telecommunications *cell site* sa Lemery, Batangas niadtong Agosto.

Samtang, 17 sa mga akusado sa kaso sa Globe ang gisang-atan usab og kasong *murder* kalambigit sa usa ka ambus sa Bagong Hukbong Bayan sa mga elemento sa PNP Regional Mobile Group sa Puerto Galera, Oriental Mindoro niadtong Marso 3, 2006 kundiin duha ka pulis ang namatay ug tulo ang hisamdan. Setenta-e-dos nga mga tawo ang kinatibuk-ang gidaghanon sa mga akusado sa kaso sa Mindoro Oriental, ug 30 kanila mga dayag nga lider-masa ug aktibista.

Usa-usa na karon nga gipik-ap ang mga akusado niining mga kaso.

Pinaka-ilhado nga biktima si Atty. Remigio Saladero, nag-unang abogado sa KMU. Iligal siya nga gi-aresto sa komposit nga mga elemento sa Antipolo Police ug Military Intelligence Group 4A sa ISAFP

sa iyang panimalay sa Antipolo City niadtong Oktubre 23 ug gidala pagkaugma sa Calapan City, Mindoro Oriental alang sa bista sa tinumo-tumo nga kaso nga gisang-at batok kaniya. Usa usab si Saladero sa mga akusado sa arson kalambigit sa pagsilab sa *cell site* sa Globe Telecommunications

Niining Nobembre 3 usab, gi-aresto si Rogelio Galit, tigpamâbâ sa Kalipunan sa mga Magsasaka sa Kabite (Kamagsasaka-Ka) sa iyang balay sa Silang, Cavite kalambigit sa kaso sa Oriental Mindoro. Usa ka tuig na nga naghigdaan si Galit tungod sa sakit nga *diabetes* ug natakda na untâ nga operahan di-

hang gipik-ap siya sa 15 nga mga elemento sa Cavite PNP ug *regional intelligence*. Gidala usab siya pagkaugma sa *provincial jail* sa Calapan, kundiin nakadetine na usab ang tulo pa nga sama niya nga akusado nga sila Attorney Saladero, Nestor San Jose ug Crispin Zapanta. Si Zapanta, *coordinator* sa Bayan Muna sa Antipolo City, gi-aresto niadtong Oktubre 27.

Kusganong gimakmak sa nagkalain-laing progresibong organisasyon ang gihi-mong paglutos sa mga lider-masa ug aktibista sa Southern Tagalog. Sumala

ni Bayani Cambroner, *regional coordinator* sa Bayan Muna-Southern Tagalog, ang kampanyang pagpanumpo kabahin sa pagkriminalisa sa mga aktibista. "Gisang-atan mi sa gobyernong Arroyo og mga ginama-gama nga kaso tungod sa kapakyasan niini nga pahilomon kami pinaagi sa ekstrahudisyal nga pagpamatay," niya pa. **AB**





Nagkadaghang sibilyang Moro ang biktima sa militarisasyon

Nagkadaghan ang mga sibilyang Moro nga gibiktima sa mabangis nga operesyong militar sa Armed Forces of the Philippines (AFP) sa ubay-ubang nga dapit sa Mindanao.

Sumala sa taho sa International Committee of the Red Cross (ICRC) niadtong Oktubre 29, sa mga *evacuation center* sa Datu Piang, Maguindanao pa lamang anaa na'y 55,000 nga mga indibidwal nga namakwit sa iya-iyahay'ng mga panimalay, gikan sa 35,000 nga mga tawo niadtong Agosto. Gikan Agosto hangtud ikatulo nga semana sa Oktubre, mosangko na sa 127,164 nga mga pamilya o 611,753 nga mga indibidwal ang naapektaran sa mga panagsangka tali sa MILF ug AFP sa mga probinsya sa Lanao del Norte, Lanao del Sur, Sultan Kudarat ug Maguindanao.

Kaylap ang kaalingasa. Ang grabing militarisasyon nagbunga na og nagkalain-laing problema sa panghunahuna sa mga bakwiter. Sumala sa imbestigasyon sa Commission on Human Rights (CHR) niining Oktubre, kaylap ang mga timailhan sa *traumatic distress* sa mga bakwiter sama sa pagkaalingasa, pagkamahadlokon o pagkamasuspetsahon. Ang maong mga sim-tomas nakita diha sa mga bakwiter gikan sa Lanao del Norte nga namakwit paingon sa Kauswagan ug Kolambugan sa gii-ngon nga probinsya ug sa 17 uban pang *evacuation center* sa Ozamiz City ug Tudela sa kasikbit nga probinsya sa Misamis Occidental. Segun sa CHR, usa ka hinungdan niini

ang pagkaylap og mga hungihong nga naay nagbung-aw nga mga panagsangka tali sa AFP ug MILF.

Nag-alingasa usab bisan ang mga Moro nga namuyo pa gihapon sa iya-iyahay'ng mga baryo. Sumala sa *Luwaran*, ang *website* sa MILF, daghang lumulupyong sa Barangay Inas ug Dungguan sa Mlang, North Cotabato ang nag-empake ug nangandam pagbakwit human sugdi sa militar ang pagsensus sa mga lumulupyong Moro niadtong Oktubre 18. Walay gihatag nga rason ang mga sundalo sa gihimo nilang pagsensus busa nagsuspetsa ang mga Moro sa lugar nga anaay "giluto" ang militar batok kanila.

Dili ikatingala ang kahadlok nga gibati sa mga Moro sa giingon



nga lugar. Duha ka adlaw usâ sugdi sa mga sundalo ang sensus sa Mlang, tulo ka sibilyan ang gidagit sa mga elemento sa 40th IB sa Barangay Nalapaan nga duol sa lungsod sa Pikit, North Cotabato. Ang mga gikuut mao sila Rahman Suleik, anak niya nga si Taurin Suleik ug si Tontongan Dilang-galen.

Sa kasikbit nga probinsya sa Maguindanao, unom nga mga tawo ang basta na lamang gi-aresto sa Barangay Linantangan, Mamasapano niadtong Oktubre 16 ug gipangulata. Nailhan ang mga biktima nga sila Aladin Lamalan, Ding Datuan, Alimudin Ibrahim, Daud Ibrahim, Binyamin Abdulatip ug usa ka nagngalang Kaumbo. Anaa gihapon sa kamot sa militar ang upat kanila.

Kapin 100 nga kabalayan usab sa mga sibilyan ang gisilaban sa mga sundalo sa Barangay Nimao ug Andabit sa Datu Piang, Maguindanao niining tunga-tunga sa Oktubre, sumala usab sa *Luwaran*.

Mga bakwiter, gipagutman sa AFP. Samtang, naglisud na gani ang mga bakwiter, gihikawan pa sa AFP og kinahanglanon nga ayuda. Gipugngan sa mga sundalo sa 54th IB niadtong Oktubre 23 ang usa ka komboy sa United Nations World Food Programme dihang mi-agi kini sa usa ka tsekpyont sa Dapiawan, Datu Piang, Maguindanao nga anaay gidala nga pagkaon.

Alang untâ kini sa gatusan ka mga pamilya nga namakwit sa Libutan, Mamasapano, Maguindanao nga gigutom na sukad sila did-i sa mga sundalo nga manarbaho sa ilang mga umâ ug anihon ang ilang mga produkto.

Ang mga mangahas nga mo-adto sa ilang mga umâ pamusilon gilayon. Duha ka mag-uuma na ang hisamdan, sumala sa *Luwaran*. **AB**

Mopadayon ang mga imperyalistang palisiya sa US ubos kang Obama

Ang mosunod kinutlo sa pamahayag nga gipagula sa Partido Komunista sa Pilipinas niining Nobembre 7.

Gasalamin sa pagdaog ni Barack Obama sa eleksyong pangpresidente sa US ang kaylap nga pagsalikway sa katawhang Amerikano sa militarista ug neokonserbatibo nga rehimeng Bush. Si Obama, nga milansar ubos sa Democratic Party, naglarawan sa kaugalingon isip tugbang kuno sa Republican nga si George W. Bush. Gipahimuslan niya ang kasamtangang grabi ug kaylap nga diskontento sa katawhang Amerikano diha sa rehimeng Bush, ilabina taliwala sa dagkong pangpolitika ug pangmilitar nga kapakyasan sa US diha sa Iraq ug Afghanistan ug sa pinakagrabi nga krisis pang-ekonomiya sa US sukad niadtong Great Depression.

Apan unsaman nga kalahian nila Obama ug Bush nagkahanap pag-abot sa baruganan nila bahin sa nagpadayon nga mga imperyalistang palisiya sa hegemonismo, pagpanglungkab ug gubat. Gipakita sa ilang batakan nga managsamang baruganan mahitungod niini nga girepresentaran lamang nila ang duha ka paksyon sa monopolyo burgesya sa US.

Ang nahitabo nga nagkalalom nga resesyon ug desperasyon sa US ug pangkalibutang sistemang kapitalista nagduso sa US nga pasamoton ang imperyalistang pagpahimulos, pagpanglungkab ug pagpanaugdaog sa kaugalingong nasud ug mga semikolonya niini, mangibog og uban pang dapit sa ekspansyon ug molunsad og mga kontra-rebolusyon ug mapanulong nga gubat.

Padayon nga palapdon sa US ang *military-industrial complex* niini, mopakita og kusog-militar ug molunsad og dagko ug gagmay nga gubat aron ihandus ang hegemonismo niini, santaon ang mga karaybal niini nga tibhang an lapad niini nga gingharian ug molog og bag-ong mga merkado ug teritoryo aron dugangan pa ang pagpanglungkab ug impluwensya sa US. Si Obama mosilbing bag-o

na usab nga nag-unang instrumento lamang niining tanan. Mosilbing malinglahon nga pangtabing sa agresyon ug hegemonismo sa imperyalismong US ang populistang retorika ni Obama.

Ang kamatuoran, inutro-otro na nga gi-endorso ni Obama ang teroristang gubat nga gisugdan ni Bush. Gisugyot niya ang pagdugang og 10,000 nga mga tropa sa Afghanistan ug paglunsad og mga *unilateral strike* sa mga utlanan niini ug Pakistan, aron kuno lutuson ang al-Qaeda. Samtang nawagan nga paulion na ang mga tropang Amerikano gikan sa Iraq, gipatin-aw usab niya nga kinahanglan kuno nga ipadayon sa US ang presensyang militar niini didto aron segurohon nga ipatuman sa itoy nga gob-

yernong Iraqui ang mga diktar sa US.

Niadtong Hunyo, gipasiugda ni Obama ang padayon nga interbensyong militar sa Pilipinas dihang gibungat niya nga suportahan niya ang Balikatan *military exercises* segun sa "paghigalahay" sa US ug sa neokolonyal nga kliyenteng estado niini. Hingpit niya nga gipakawalay-pulos nga gitakpan lamang sa Balikatan ang nagkadakong permanenteng presensyang militar ug interbensyonismo sa US sa Pilipinas. Nanawagan na siya alang sa pagpalapad sa mga programa aron armas an militar sa Pilipinas. Dayag kini nga pagpanamastamas sa gatusan ka libo nga nabiktima na sa Oplan Bantay Laya sa rehimeng Arroyo nga gigiyahan ug gisuportahan sa militar sa US.

Hugot nga nawagan ang Partido Komunista sa Pilipinas (PKP) sa katawhang Pilipino ug Amerikano ug sa mga katawhan sa mga semikolonya sa US ug ubang kanasuran nga nakigbisog alang sa nasudnong kalingkawasan ug demokrasya nga dili magpalingla sa bag-ong pinili nga presidenteng Amerikano. Kompyansado ang PKP nga ang hut-ong mamumuo ug katawhan sa kalibutan padayon nga mopursigi sa ilang pakigbisog batok sa imperyalismo ug reaksyon, ug aron kab-oton ang nasudnon ug katilingbanong kalingkawasan, demokrasya ug kalamboan. AB



Alternatibo nga komperensya sa mga migrante, malamposon nga gilunsad

Nagmalamposon nga gilunsad sa mga progresibong organisasyon gikan sa nagkalain-laing nasud ang pinaka-una nga internasyonal nga komperensya bahin sa mga isyu sa mga migrante ug *refugee*. Ang International Assembly of Migrants and Refugees (IAMR) gilunsad isip alternatibo sa ikaduha nga Global Forum on Migration and Development (GFMD) nga gipahigayon sa Pilipinas niadtong Oktubre 28-30.

Malamposon usab ang kampanya sa mga grupong migrante, sa pagpanguna sa International Migrants Alliance, alang sa "Zero Remittance Day" niadtong Oktubre 29. Niining adlaw, gilikayan sa mga migrante nga magremit og unsamang kantidad isip protesta sa gambalay ug mga kampanya sa GFMD.

Gilunsad ang unang porum sa mga imperyalistang nasud ug institusyon sama sa World Bank niadtong Hulyo 2007 aron suportahan ang kasamtangang sistema ug lakang sa paghakop sa adunahang kanasuran sa barato nga kusog-pamuo. Gihataga'g rason ug gidani niini ang labaw pang pangkalibutang eksportasyon sa mga mamumu gikan sa kabus nga kanasuran sa ngalan sa "*global migration*."

Gipakaylap niini ang panawagan nga "migrasyon alang sa kalamboan" ug "katungod sa migrasyon" aron hataga'g rason ang pagpahimulos sa adunahang kanasuran sa barato ug masinugtanon nga kusog-pamuo gikan sa mga atrasadong kanasuran. Gihulagway niini nga ang pagpadala og mga remitans sa mga migrante diha sa gigikanan nga kanasuran alternatibo nga pamaagi paingon sa kalamboan ug kasulbaran sa kalisdanan. Gihulhog usab niini ang paggamit sa mga remitans sa mga migrante aron kapun-an ang mga depisit sa badyet ug pangbayad sa langyaw'ng utang sa mga atrasadong kanasuran.

Timailhan sa kawalay-pulos ni-

ni, gitipon sa GFMD ang pinakadagkong kanasuran nga tiglapas sa katungod sa mga migrante. Wala gyud giimbitaran ang mga organisasyon nga dugay nang nakigbisog alang sa mga katungod ug kaayohan sa mga migrante.

Labaw'ng sibaw ang kawalay-pulos niini karong gilunsad kini sa Pilipinas ubos sa pagdumala sa rehimeng Arroyo. Walay molabaw niining rehimen sa pagkahinakop sa mga remitans sa mga migrante bisan pa sa kaalaotan ug kadaot nila ug ilang mga pamilya. Tibuok gyud ang pagdawat sa rehimen sa gambalay sa GFMD tungod kay gi-

palig-on niini ang *labor export policy* sa estado ug pagsalig sa mga remitans isip tigsalbar sa bangkrap nga ekonomiya.

Sa pikas bahin, nagtipon sa IAMR ang mga grupong migrante aron patas-an ang ang-ang sa ilang panaghiusa ug palig-onon ang ilang pakigbisog alang sa ilang mga katungod ug kaayohan. Nag-inam-bitay sila og mga kasinatian sa iya-iyahay'ng gigikanan nga nasud ug mga nasud nga gitrabahoan. Gimakmak nila ang gambalay sa GFMD ug nanawagan sa mga gobyerno sa tibuok kalibutan nga taposon na ang linugsanay'ng migrasyon ug se-gurohon nga anaa sila'y mga trabaho sa iya-iyahay'ng nasud. Gipanawagan usab nila ang pagrespetar sa mga katungod sa mga migrante ug paggarantiya sa ilang kaayohan. **AB**

Pilipinas, ikalima sa mga nasud nga gigutom

IKALIMA ang Pilipinas sa mga nasud nga gigutom sa kalibutan, sumala sa World Food Survey sa Gallup International-Voice of the People 2008. Ang talaan sa mga gigutom nga nasud gipagula niining Nobembre 4 matapos ang pagsurbey sa 58,000 nga mga tawo gikan sa 55 kanasuran sa Asia, Africa, Latin America ug Europe niadtong Hunyo ug Septembre kalambigit sa paghinumdum sa World Food Day.

Sumala sa Gallup, 40% sa mga Pilipino ang nagbungat nga kanunay o pulupanahon sila nga walay makaon o kulang sa pagkaon niining nangaging 12 ka bulan. Migawas sa surbey nga pinakataas ang tantos sa kagutom sa nasud sa Metro Manila, ang nasudnong kaulohan kundiin naapektaran ang tunga sa milyon nga pamilya.

Ang mga nasud nga gisurbey sa Gallup kundiin pinakagrabi ang kagutom mao ang 1) Cameroon, 55%; 2) Pakistan, 53%; 3) Nigeria, 48%; 4) Pero, 42%; 5) Pilipinas, 40%; 6) Bolivia, 35%; 7) Guatemala, 35%; 8) Ghana, 32%; 9) Mexico, 23%; ug 10) Russia, 23%.

Mas grabi pa ang resulta sa surbey sa Gallup itandi sa makabala-ka na gyud nga resulta sa surbey sa Social Weather Stations kundiin migawas nga 16.8% sa katawhang Pilipino ang nahiagom sa kagutom niining ikatulo nga kwarter sa 2008. **AB**

Pagtabon sa iskandalo sa "Euro Generals," gitulisok

GITULISOK nila Rep. Satur Ocampo ug Teodoro Casiño sa Bayan Muna ang desisyon ni Rep. Rodolfo Albano, tserman sa House Committee on Public Order and Safety, nga suspendihon ang imbestigasyon sa pila ka tag-as nga opisyal sa Philippine National Police (PNP) nga gihinganlan og "Euro Generals." Wala mo-uyon ang mga progresibo nga magbabalaud sa pasumangil ni Albano nga ang kaso giimbestigahan na sa PNP, National Police Commission (Napolcom) ug Office of the Ombudsman.

Sila Ocampo ug Casiño ang nagsang-at sa House Resolution No. 843 nga nanawagan og hingpit nga imbestigasyon sa walo nga mga opisyal sa PNP nga mitambong sa tigom sa Interpol sa Russia niadtong Oktubre. Mopauli na untâ sila niadtong Oktubre 9 dihang gibabagan sa mga pulis sa erport sa St. Petersburg si P/Dir. Elizeo de la Paz tungod sa gidala niya nga ₱6.9 ka milyon (105,000 euros), labaw sa gitugotan sa balaud. Usa ka semana nga natanggong ang heneral kuyog ang iyang asawa samtang gipauli usab sila P/Dir. Silverio Alarcio, German Doria ug Romeo Ricardo, Dep. Dir. Gen. Emmanuel Carta ug Ismael Rafanan, Chief Supt. Jaime Caringal ug Supt. Elmer Pelobello.

Sa imbestigasyon sa Senate Foreign Affairs Committee niadtong Oktubre 23, wala matin-aw nila Interior Secretary Ronaldo Puno (kasamtangang hepe usab sa Napolcom) ug Police Director General Jesus Verzosa kung nganong ingon niato kadaku ang pabalon sa tag-as nga opisyal sa PNP nga kuyog pa gyud ang ilang mga asawa. Sensilyo lamang kining kantidara itandi sa minilyon-milyon nga pundo nga lambigit sa uban pang mga iskandalo nga gikalambigitan nila Arroyo ug mga bata-bata niya.

Bisan pa niana, segun sa mga naghingusog nga imbestigahan ang panghitabo, imoral kini atubangan sa grabing kalisdanan sa nasud.

Daghang gihatag nga mga pasumangil sila Puno ug Verzosa nga nagpalubog kundili man nagtakop lamang sa isyu. Nila pa, ang gidala

nga kwarta "*cash advance*," "*contingency fund*" ug niining ulahi, pangpalit kuno og mga kahimanang paniktik. Migawas nga gawas pa sa ₱6.9 ka milyon nga gidala ni De la Paz, kanhing *comptroller* sa PNP, anaay "*contingency fund*" pa nga ₱2.192 ka milyon o ₱274,070 matag usa.

Impeachment batok kang Arroyo, gi-endorso ni JDV

GI-ENDORSO ni kanhing Speaker Jose de Venecia Jr. ang kaso nga *impeachment* batok kang Gloria Arroyo niining Nobembre 4. Gilagdaan niya ang mga papeles niini sa konsulada sa San Francisco, California kuyog ang mga Pilipino-Amerikano nga membro sa Bayan-USA, Gabriela ug National Alliance for Filipino Concerns. Pormal nga isumitir ang dokumento sa Lower House sa pagbukas sa sesyon niini sa Nobembre 10. Duyog niini, gipadayag ni De Venecia nga buot siya nga motestigo sa kaso ug ibutyag ang tanang perso-nal niya nga nahibaw-an bahin sa mga kasong korapsyon nga gikalambigitan ni Arroyo.

Ang ika-upat nga kasong *impeachment* sukad niadtong 2004 gisang-at niadtong mi-aging Oktubre sa anak ni De Venecia nga si Joey, Atty. Harry Roque ug Iloilo Vice Gov. Rolex Suplico. Nauna kini nga gi-endorso nila Rep. Satur Ocampo ug Teddy Casiño sa Bayan Muna ug Rep. Liza Maza sa Gabriela Women's Party. Lakip sa reklamo ang dayag nga pag-abuso sa gahum sa presidente; mga paglapas sa konstitusyon; kaso nga korapsyon sama sa NBN-ZTE *deal*, Northrail Project ug ₱728 ka milyon nga "*fertilizer scam*"; ug mga ekstrahudisyal nga pagpamatay ug uban pang paglapas sa tawhanong katungod.

Samtang, padayon nga nanawagan sila Archbishop Angel Lagdameo, presidente sa Catholic Bishops' Conference of the Philippines (CBCP); Archbishop Oscar Cruz sa Lingayen-Dagupan (Pangasinan); Bishop Emeritus Jose Sorra sa Legazpi (Albay); Bishop Joel Baylon sa Masbate; ug Bishop Socrates Villages sa Balanga (Bataan) nga kinahanglan na nga pulihan gilayon ang gobyernong Arroyo tungod sa grabing korapsyon niini.

Gisuportahan sa Bagong Alyansang Makabayan ug mga patriyotiko ug progresibong organisasyon ang panawagan nila Lagdameo. Misuporta usab si Archbishop Leonardo Legaspi sa Nueva Caceres (Camarines Sur); ang Bishop-Businessmen's Conference nga gipangulohan ni Archbishop Antonio Ledesma sa Cagayan de Oro; National Council of Churches in the Philippines; ug Chief Justice Reynato Puno sa Korte Suprema. Nakighiusa usab si Rev. Eddie Villanueva sa Jesus is Lord Movement nga nanawagan sa tanang lider sa CBCP, mga simbahang Protestante ug Evangelical, mga lider-relihiyosong Muslim ug uban pang grupong relihiyoso nga maghisgot ug mogambalay og komun nga baruganan ug angay nga mga lakang.



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo


Edisyong Bisaya
Bolyum XXXIX Numero 21
Nobembre 7, 2008
www.philippinerevolution.net

Editorial

Korapsyon taliwala sa krisis

Subling mibusikad ang walay kinutuban nga korapsyon, kabaklagan ug pagmaniobra sa rehimeng Arroyo diha sa pagbuto na usab sa daan ug bag-ong mga kaso sa korapsyon. Dugang misibaw ang hisgotanan karon tungod sa nagkalain-laing pamaagi nga gihimo niini aron mapugngan ang imbestigasyon kang kanhi Undersecretary of Agriculture Jocelyn "Jocjoc" Bolante. Si Bolante, ang hepe sa mga opeytor ni Arroyo niadtong 2004 sa pagpangawat og P2.8 ka bilyon nga pundo sa Ginintuang Masaganang Ani, gipabalik bag-ohay pa lamang sa Pilipinas human gibalibaran sa US ang hangyo niya nga *asylum* (pagpadangop) didto.

Walay kalahian ang mga maniobra karon sa nagharang rehimen sa pagbangot usab niini sa uban pang mahimong motestigo mahitungod sa mga krimen nga gikalambigitan sa pamilyang Arroyo. Ang desperado ug garapal nga pagsulay sa rehimeng Arroyo nga pugngan nga mosulti si Bolante sa Senado nagpakita sa hilabihan nilang pagkahadlok nga mabutyag unya sa publiko ang gikalambigitan nilang mga anomalya ug krimen nga siguro gyud nga makapasilaob sa kasuko sa katawhan. Hingpit ang pagpangningkamot sa rehi-



meng Arroyo nga ipabilin nga sirado ang mga sikreto sa anomalya sa Ginintuang Masaganang Ani ilabina kay laraw nila nga gamiton pag-usab ang mao gihapon nga iskema sa mo-abotay nga eleksiyong 2010. Sa balaudnon nga badyet sa rehimen alang sa 2009, kapin P3.3 ka bilyon ang gigahin ni Arroyo alang kunohay sa pagpalit ug pag-apud-apod na usab og abono. Kabahin kini sa P7 ka bilyon nga bag-ong alokasyon (pagtagana) alang sa Ginintuang Masaganang Ani—ang mismong programang gihimong

gatasan nila Arroyo ug Bolante niadtong 2004. Wala'g tuo ang uban pang laraw nila Arroyo ug sa iyang mga bata-bata aron labaw pang kalimasan ug matiti ang panudlanan sa nasud.

Ang pagsamot sa korapsyon ni Arroyo niining ulahing mga tuig sa iyang paghari kabahin sa mga pagpangandam niya aron labaw'ng masiguro ang pagpabilin niya sa gahum lapas sa 2010. Labaw'ng nagkahugot ang kapot niya sa poder sa sulabi nga kabalaka nga papanubagon siya sa iyang mga kasal-anan sa katawhan.

Puloan ka bilyong pisos nga pundo ang gitigom ni Arroyo isip pagpangandam sa atubangonon niya nga mga kombating

**Mga nagbaga
ning isyuha...**

26 ka armas
na-imbargo, 43
kaswalti sa AFP-PNP
PANID 4

7 ka detenidong
kauban sa Quezon,
gipa-ikyos sa BHB
PANID 5

Imperyalismong US
ubos kang Obama
PANID 11

Mga instruksyon sa pagmantala

1. Ang **gisundan nga panid**, nga insaktong kopya sa panid 1 gawas nga daw abohon ang *masthead* o *logo* alang sa mga tiggamitan og *mimeo machine* o nagmantala pinaagi sa *v-type* (hagod). Gidisenyo kini aron dili daling maguba ang istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Tangtangan ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Segurohon nga naka-set sa **100%** ang **Scaling**
- d) Ipadayon ang pag-*print*

3. Gi-awhag ang mga kauban nga ipadangat sa editoryal istap sa *AB* ang unsamang problema kalambigit sa pagmantala pinaagi sa *v-type*. Magpadala og *email* sa *angba-yan@yahoo.com*